

VOTUM, ET SENSUS

Eminentiss., ac Reverendiss. Domini

CARD. BELLUGA

EPISCOPI CARTHAGINENSIS

PONENTIS

IN CAUSA

Hispalensis Ecclesiæ

Extensionis Officiorum

SS. ISIDORI, ET LEANDRI.



ROMÆ M. DCC. XXII.

Apud Jo: MARIAM SALVIONI Typographum VATICANUM
in Archigymnasio SAPIENTIÆ.

SUPERIORUM PERMISSU.

Eminentissimi, & Reverendissimi Domini.

312



Enerabile Capitulum Hispalense SS. D. N. sequentem Libellum porrex-
it: B. P., De-
canus, & Capitu-
lum S. Eccle-
siae Hispalensis
humili obsequio

Sanctitati Vestrae exponunt, quod cum
Sanctissimorum Praesulum dictae Ecclesiae,
nempe Leandri, & Isidori, veneratio
strictis Cancellis circumscribatur, & si
satis notum sit S. V., fuisse duo lumi-
na Ecclesiae Catholicae, statuerunt San-
ctitati Vestrae preces porrigere, ut Sancti
Leandri Festus dies sub ritu duplici in om-
nibus Hispaniarum Regnis, S. Isidori vero
sub eodem Ritu duplici in universa Eccle-
sia Dei, in Hispania vero sub Ritu duplici
secundae Classis cum Octava, & Officiis pro-
priis, aliis jam per Sedem Apostolicam
approbatis, celebretur; pro qua gratia sup-
plicat quoque S. V., nedum Serenissimus
Rex Catholicus, Eminentissimus Archie-
piscopus Hispalensis, Senatus dictae fidelissi-
mae Civitatis, ut constat ex Epistolis, quae
dantur S. V., sed & omnes fere Reveren-
dissimi Episcopi, & Capitula Ecclesiarum
Cathedralium, ac nonnullarum Civitatum
Regnorum Hispaniae, prout ex eorum Epi-
stolis praesentandis in Sacra Congregatione
Rituum apparet; Et praefatam gratiam a
Sanctitate Vestra consequi sperant, ex ra-
tionibus adductis in supplici Epistola per
eosdem Oratores S. V. directae, quae datur
annexa, & Deus &c.

Hunc libellum Sanctitas Sua huic Sacrae
Congregationi dignata fuit remitte-
re, a qua mihi commissum est, ut rem

examinem, & sensum meum aperi-
am, & referam.

Quod ut adimpleam, licet ea, quae con-
ducere possunt, & allegari pro hac ex-
tensione, a V. Capitulo Hispalensi in
suis scriptis sint jam exposita; cum
illis non obstantibus Reverendissimus
D. Prosper Lambertinus, Promotor
Fidei, utrique praetensioni, ut mu-
neris sui est, se opponat; opere pre-
tium mihi videtur, de omnibus re-
lationem facere, ut mentem meam
huic Sacrae Congregationi aperire
valeam.

S. I.

I **P**rimae praetensioni extensionis Offi-
cii Sancti Isidori, quoad utramque
partem praedictus Reverendissimus D.
Promotor opponit. Quo ad primam
(extensionis ad totam Ecclesiam
Officii ejus pro Hispania concessi),
quod si Officium S. Isidori, quod
pro Hispania est concessum, exten-
deretur ad universam Ecclesiam,
cum officium sit Doctoris, ab omni
Ecclesia tanquam Doctor celebrare-
tur, cum tamen ab Ecclesia, ut talis
celebrari non debeat, quando uti ta-
lis ab ea non est declaratus, quod re-
quiri testatur Petrus Annatus in appa-
ratu ad Theologiam positivam lib. 4. ar-
tic. 1., quem sequitur Rabaud. in exer-
citationibus Theologicis tom. 2. exercit. 4.
cap. 9. Quoad secundam (nimirum,
quod pro tota Hispania concedatur
idem Officium sub Ritu secundae
Classis cum Octava) obiicit Rubri-
cam 7., quae videtur hanc praetensionem
excludere. Et secundae praeten-

A 2 fio-

fioni [nimirum extensionis Officii Sancti Leandri pro tota Hispania sub Ritu duplici] adhuc objicit, quòd cum intercessione S. Leandri nullum Deus miraculum de novo patravērit, quòd indicet ejus voluntatem esse, quòd hæc extensio fiat, non est cur veniat faciēda, nec S. Leander in Officio cum Sancto Isidoro, & si germano fratre, æquandus.

2 Hæc sunt præcipua fundamenta, quæ hodie militant contra hanc prætensionem, quibus V. Capitulum satisfacere conatur, ut Eminentis Vestræ satis notum est.

3 Hoc supposito, licet ambæ Scripturæ, à V. Capitulo Hispalensi traditæ, judicio meo possent sufficere pro inclinando animum hujus Sacre Congregationis ad hanc gratiam concedendam, tamen cum Civitas Carthaginensis meruerit pro filio habere non solum Isidorum, quod pro ejus gloria sufficeret, sed & SS. Leandrum, Fulgentium, & Florentinam, ex Patre Severiano ipsius Civitatis Duce Germanos Fratres. Et cum hæc Civitas haud solum sit Capitalis Diocesis mihi [etsi inmerito] commissæ, sed & ipsamet Domus, in qua nati, & educati fuerunt, sit propria Episcoporum in illa Civitate habitatio, ubi summa cum reverentia locus, in quo nati fuerunt, constructo ibi Oratorio, magno cum spiritali incolarum profectu, & in suis necessitatibus remedio, colitur: Et cum non sine speciali Dei providentia hoc negotium ab hac Sacra Congregatione mihi commissum credam: Ex hac antidotali obligatione, qua Episcopi Carthaginenses sumus affecti erga tam insignes Sanctos (quorum Fulgentius est totius Diocesis Carthaginensis, tanquam ejus Episcopus, unicus Patronus) simul, & devotione singulari, qua erga eos fruor: Ex his, inquam, cogor, urgeor, & dulciter fecor, non ad qualemcumque positio-

nem, etiam eam, quæ pro munere meo rectè adimplendo sufficeret, sed ad exponendum huic Sacre Congregationi, quid quid pro tenuitate mea conducere posse existimem pro hoc negotio instruendo, meritisque utriusque Sancti ostendendis, insuper pro alliciendo [ita fateor] & inclinando animum hujus Sac. Congregationis ad has gratias, si iustæ visæ fuerint, assequendas; quandoquidem aliter ingratitudinis argui à præfatis Sanctis possem. Inde coactum me video, præter exposita, & allegata à Scribentibus pro prætensione V. Capituli Hispalensis [licet sufficientissima ea existimem], aliqua denuò superaddere; itaque, nonnullis ex allegatis pro parte V. Capituli excerptis, ex omnibus, & si aliquantulum præter morem immorer, sensum meum fundare, & aperire.

4 Tota difficultas hujus negotii, incipiendo à Sancto Isidoro, extensioneque sui officii sub Ritu duplici Doctoris, ut in tota Hispania celebratur, in eo sistit, quòd ab Ecclesia non est uti Doctor declaratus, itaque ut talis ab ea coli non debet. Unde satisfacta hac Animadversione, tota difficultas de medio sublata judicio meo erit.

5 Verum est [ut ait Reverendissimus Promotor], quòd Petrus Annatus, natione Gallus, interrogans, *Quinam sint Doctores Ecclesiæ dicendi?* loco supra citato num. primo ait: *Ut quis Doctor Ecclesiæ dici possit, requiruntur in eo multo plura, videlicet eminens doctrina, insignis vitæ Sanctitas ad mortem usque, & Ecclesiæ declaratio.* Cæterum ultra progrediens, postea conclusionem statuit, in qua illa verba, *Ecclesiæ declaratio*, explicat, & modificat. Enim verò suam conclusionem ita concipit: *Dico, eos solos propriè Doctores Ecclesiæ dicendos esse, quos ob eminentem doctrinam, & insignem Vitæ Sanctitatem, ut tales agnovit, sive recepit, vel declaravit Ecclesiæ.* Et infra S. Probatur
ter-

IN CAUSA HISPALENSIS ECCLESIAE &c.

tertio ampliùs hoc explicat, dum ait; Ergo ad constituendum Ecclesiæ Doctorem, præter eminentem doctrinam, & insignem vitæ Sanctitatem, requiritur Ecclesiæ declaratio, saltem aliqua tacita, vel expressa.

6 Et tandem, §. ultimo ita sibi objicit: Si ad constituendum Ecclesiæ Doctorem declaratio requiratur Ecclesiæ, sequitur quatuor dumtaxat Ecclesiæ Doctores esse, videlicet SS. Gregorium Magnum, Augustinum, Ambrosium, & Hieronymum: Hos enim solos, aliorum nulla mentio facta, dignis honoribus venerandos proposuit Bonifacius Octavus in sua Decretali: At qui id dici non potest, cum plures alios, præter quatuor illos, veneretur Ecclesiæ Doctores; Ergo ad constituendum Ecclesiæ Doctorem non requiritur Ecclesiæ declaratio. Verùm objectioni sic respondet. Dico, Bonifacium VIII. ibi nullum de novo constituere, declarare, aut proponere venerandum Ecclesiæ Doctorem, sed solum statuere, ordinare, & præcipere, ut per universas Orbis Ecclesias duodecim Apostolorum, Evangelistarum, & quatuor istorum Ecclesiæ Latine Doctorum, Gregorii, Augustini, Ambrosii, & Hieronymi, Festa solemniter sub duplici celebrentur Officio; istis autem quatuor antiquis Ecclesiæ Latine Doctoribus egregiis, & non aliis, hos decrevit honores Summus ille Pontifex, quia cæteris notiores erant, eorumque doctrina magis Fidelium omnium usu comprobata; Unde non ideo soli, sed tantum præcipui Ecclesiæ Doctores dicendi sunt.

7 Ex quò hæc duo ex mente hujus Authoris deducuntur. Primum, sufficere ad hoc, ut aliquis Sanctus, qui in Doctrina eminens, & vitæ Sanctitate insignis sit, Doctor Ecclesiæ dici valeat, quòd Ecclesiæ, ut talem eum agnovit, sive receperit, approbaverit, vel tacite, vel expressè declaraverit. Secundum, Bonifacium VIII. in sua Decretali non declarasse, in Ecclesiæ præter illos quatuor Doctores nullum alium esse, ut Doctorem in illa habendum, sed illos quatuor, ut

præcipuos inter alios Ecclesiæ Doctores esse tenendos, ut concludit: Unde non ideo soli, sed tantum præcipui Ecclesiæ Doctores dicendi sunt.

8 Et eodem modo procedit Rabaudus in verbis à Reverendissimo D. Promotore allegatis. Etenim ejus verba hæc sunt: Ad hoc, ut aliquis inter selectos Ecclesiæ Doctores possit recenseri, oportet, quòd ab eadem Ecclesiæ, puta, ejus Capite visibili, aut à Concilio generali, uti talis receptus fuerit, & approbatus. In quibus pari modo, ac Annatus procedit. Namque primò, non exigit expressam declarationem, sed quòd ut talis receptus fuerit, & approbatus. Secundò, has qualitates solummodò petit ad hoc, ut reputari valeat, tanquam unus ex selectis Ecclesiæ Doctoribus, ibi: Inter selectos Ecclesiæ Doctores possit recenseri; quòd supponit, alios Ecclesiæ Doctores minus selectos esse.

9 Hoc supposito, cum in præsentiarum non tractetur de gradu superioritatis S. Isidori, nec curetur de declaratione, & annumeratione inter illos primarios Selectos Ecclesiæ Doctores; quandoquidem pro prætensione præsentis sufficit, quòd de illo tres illas qualitates habere, verificetur, nimirum eminentem Doctrinam, insignem vitæ Sanctitatem, & quòd ut Doctorem agnovit sive recepit, approbavit, vel declaravit Ecclesiæ tacite, vel expressè; inde apparet, quòd ex mente utriusque Auctoris tanquam Ecclesiæ Doctor haberi queat. Et quòd de illo illæ tres qualitates verificentur, mihi certum apparet.

10 Nam in primis, quòd attinet ad ejus Doctrinam, & Sanctitatem, adeò in utraque eminens fuit, quòd Sanctus, Braulio Archiepiscopus Casaraugustanus ejus discipulus (quem die 3. Martii colit Ecclesiæ, ut in Martyrologio Romano habemus) in abbreviatione de ejus vita, quæ extat apud Papebrochium die 4. Aprilis cap. 11. hæc de eo scribat: *Isidorus Vir*

Egregius (natione Carthaginensis, à Patre Severiano, Nobilissimo ejusdem Patriæ Duce, genitus) Hispanensis Ecclesiæ Archiepiscopus, Sanctissimis Episcopis, & Confessoribus Leandro, & Fulgentio, ac Sanctissimæ Florentinæ Virgini Præpositæ Virginum, extitit germanus, & Sancto Leandro Successor Sanctissimus. Vir iste beatissimus à pueritia studiis litterarum traditur, Latinis, Græcis, & Hebraicis litteris instructus, omnium locutionis genere formatus, in trivii eruditione conspicuus, in quatrivii instigatione perfectus, Divinis, & Humanis legibus ad plenum eruditus, suavis eloquio, ingenio præstantissimus, vita quoque, atque doctrina fuit clarissimus, & meritò à cunctis Hispaniarum Doctor nominatus. Sic namque de virtute in virtutem refulsit Doctor eximius, ut secundum qualitatem sermonis omnibus, videlicet Latinis, Græcis, & Hebrais Sapientibus, atque incomparabili eloquentia strenuus.

- 11 Et infra, postquam miris laudibus omnia ejus scripta, quæ adeo Ecclesiam illustrarunt, & illustrent retulerat, ait: *Tanta debitatione scientiarum claruit prædictus, ut non solum nostris temporibus, verum etiam à tempore Apostolorum, vel ante [primò homine, & Salomone exceptis] in scientiarum varietate, ut credimus, nemo extitit illi primus.* Et infra: *Fuit præterea spiritu prophetia clarus, in elemosynis largus, hospitalitate præcipuus, corde severus, in sententia verax, in judicio justus, in predicatione assiduus, in exhortatione lætus, in lucrandis Deo animabus studiosus, in expositione Scripturarum multus, in consilio providus, in habitu humilis, in mensa sobrius, in oratione devotus, honestate præclarus, semper pro Ecclesia, ac veritatis defensione mori promus, & omni bonitate conspicuus. Præterea Pater extitit Clericorum, Doctor, & sustentator Monachorum, ac Monialium; consolator merentium, tutamen pupillarum, ac viduarum, levamen oppressorum, defensor civium, attritor superbiorum, persecutor, & malleus hæreticorum; & quid plura? Speculum bonorum omnium factus*

est mundo, & ideo jam sine fine regnat cum Christo. Quo vero flumine eloquentia, & quibus jaculis divinarum Scripturarum, seu Patrum testimoniis omnium, nefarias hæreses destruxerit, & enervaverit, Synodalia gesta, coram eo Hispani, vel Toleti, atque declarant, in quibus, & Romano Pontifici à Fidelibus, loco Beati Petri Apostoli substituto, debere obediri, & uni Deo in Trinitate Personarum serviri, clarissimis Scripturarum testimoniis approbavit?

- 12 Et infra: Sicut Gregorius Doctor Romæ successit Petro, ita B. Isidorus in Hispaniarum partibus doctrina Jacobo successit Apostolo. Semina namque, quæ Beatissimus Jacobus seminavit, hic Beatissimus Isidorus verbo predicationis, quasi unus ex quatuor Paradisi fluminibus sufficienter irrigavit, atque universam Hispaniam, tam exemplo boni operis, quam fama Sanctitatis, velut splendidissimus solis radius illuminavit.

- 13 Non minori ponderatione de ejus Sanctitate, & Doctrina, loquitur Sanctus Ildephonsus, ejus pariter Discipulus, tum libro de Viris illustribus, ubi cap. 9. de Magistro suo agit, tum etiam in carminibus, quæ Papebrochius tradit Cap. 10. ejus vitæ, quos affigi Ildephonsus mandavit ad ejus Sepulchrum; Ex quibus cum multa sint, unum vel alterum decerpam, quæ in hunc modum se habent?

*Gloriam Isidori meritorum memori
Voce sonent Cantici.
Fidus fidem extulit, sive labem expulit
Erroris hæretici.
Natus de Carthagine, nihil ab origine
Puerile sapiens.
Hispani dum præfuit, Primus legem docuit
Hispanus Hispaniam.
In doctrina præmicans, Crucifixum prædicans,
Fugans Idolatriam.
Per fulgorem operum, exemplar fructiferum
Sese Clero tribuit.
Hesperus Hesperiam, lucifer Ecclesiam
Deco-*

Decoravit clarius.

Per fines Hispaniæ fontem sapientiæ

Fudit mira faciens.

Quis ad plenum promere posset, vel præscribere

Te gestorum titulis?

Lingua non sufficeret, dextera deficeret

In scribendis singulis.

- 14 Sufficerent hæc Testimonia; Sed non omittam aliud singulare, quod tradit laudatus Papebrochius ex antiquis manuscriptis Ecclesiæ Toletanæ, quæ Lucæ Tudenſis esse credit, quæque tanti habuit, quod ad litteram ea exprimit; in quibus Cap. I. hoc continetur: Denique in tantum hunc insignivit natura, gratia ditavit, extulere mores, studia provocarunt, ut Platonem ingenio, Aristotelem studio, eloquentia Tullium, copia Calcenterum, eruditione Origenem, gravitate Hieronymum, Augustinum Doctrina, Gregorium sanè prosequatur exemplis. Qui cum eidem Beato Gregorio, iussu Fratris, ac Nutricii sui Leandri, epistolam quamdam de Beatitudine, tam de Philosophorum sententiis, quam Sanctorum Scripturarum floribus, miro studio decoratam, delegasset, ac B. Gregorius perlegisset eandem; tam de Sermonum differtudine, quam de sententiarum connexione, ac scientiarum exuberantia admirans; eumque in Spiritu qualis futurus erat, intuens, fertur dixisse: Ecce alter Daniel; & quidam alius: Ecce plusquam Salomon hic.

- 15 Mitto innumera alia testimonia, quæ ex omni genere Scriptorum, tum antiquorum, tum modernorum omnium Nationum Isidori sanctitatem, & sapientiam, usque ad sidera extollunt. Sed non prætermittam ea, quæ ipsamet Ecclesia in Lectionibus sui Officii, pro Hispania concessi [quæ in Sum. sub n. I. habentur,] circa utramque qualitatem Nobis in comprobationem offert. Ingentem (ait) Doctrinam, Latine, Græcè, atque Hebraicè, cum magna nominis claritate consequutus: Hic adolescens adhuc, Hæresim Arianam,

quæ gentem Gothorum Hispaniæ latissimè dominantem penè jam pridem invaserat, tam constanter palàm arguebat, ut prope fuerit, ut ab Arianis necaretur; Ut in prima lectione. Quantum verò Pontifex factus fuerit constans, & humilis, patiens, & benignus, compatiens miseris, & pauperibus, & cunctis virtutibus insignitus, nullius lingua sufficeret ad narrandum. Scripsit librum Etymologiarum, & Sacri Canonis, libros plurimos commentatus est, & tot, tantaque alia volumina scripsit, ut humana vix vita tantis suffectura laboribus videatur; ut in secunda. Fuit denique Isidori tanta Doctrina, ac Sanctitatis opinio, ut coactò Concilio ultro fuerit à Pontifice Maximo vocatus, ubi mirum est quantum ponderis, & auctoritatis habuerit in singulis rebus Isidori sententia apud Pontificem, & omnes Prælatos: ut in tertia.

S. II.

- 16 Quod attinet ad tertiam qualitatem Doctoris, quamquàm ex huc usque dictis satis demonstrata videatur, quia tamen hoc præcipuè desideratur, quòd ut talis Doctor Ecclesiæ sit ab ipsa Ecclesia, vel agnitus, vel receptus, vel approbatus, vel tacitè, vel expressè declaratus, in hoc præsertim immorabimur. Totumque iudicio meo verificatum invenimus in Canone De libellis 20. dist., à Capitulo allegato. Ubi S. Leo IV. Isidorum inter Ecclesiæ Doctores adnumerat in illis verbis: Nam si tale emerſerit, vel contigerit inusitatum negotium, quòd minimè possit per istos (Canones videlicet) definiri, tunc illorum, quorum meministi, dicta, Hieronymi, Augustini, Isidori, vel cæterorum similiter SS. Doctorum, & similium, si reperta fuerint, magnanimitè sunt retinenda, vel promulganda.

- 17 Ubi habemus Sanctum Isidorum inter Ecclesiæ Doctores à Sancto Leone fuisse adscriptum: Etenim cum ad

hoc ex doctrina Annati, & Rabaudi sufficeret, si unum saltem ex requisitis sub disjuncto ab eis traditis, illi conveniret; in prædicto Canone omnes simul illi convenire videmus. Namque si sufficit, ut aliquem Sanctum, ut Doctorem Ecclesiæ habeamus, quod ipsa Ecclesia, ut talem eum agnoscat, ut ait Annatus, ibi: *Ut tales agnoscat*; hic habemus S. Isidorum agnitum, ut Doctorem à S. Leone ejus Capite, quin hoc in dubium verti possit. Si sufficit etiam, quod sit, ut talis receptus, ut uterque Author ait: *Sive recepit*, ut ait Annatus: *Ut talis receptus*; ut ait Rabaudus: Habemus similiter, quod à Sancto Leone, ut Doctor recipitur, quando, ut Doctorem illum nobis proponit. Si sufficit, quod sit approbatus, ut prælaudatus Rabaudus ait: ibi, & *approbatus*; nulla solemnior approbatio exigere potest, quam quod Romanus Pontifex totam Ecclesiam doceat, quod quando contigerit in ea inusitatum aliquod negotium, quod per Canones definiti non valeat, hoc fiat per dicta, seu Testimonia Hieronymi, Augustini, Isidori, vel cæterorum similiter Sanctorum Doctorem. Si tandem sufficit, ut ait Annatus, *Declaratio saltem aliqua tacita, vel expressa*, hic utramque habemus. Habemus enim tacitam in eo, quod ejus Doctrinam, non solum approbat, sicut, & Hieronymi, & Augustini, sed loco Canonum in horum defectu esse habendam pro dubiis arduis in Ecclesiæ emergentibus dirimendis, & definiendis, ait, quod sufficeret. Habemus etiam expressam declarationem: Quando quidem specificè cum inter Doctores Ecclesiæ S. Leo, ut vidimus, enumerat.

18 Cum ergo juxta prælaudatos AA. quodlibet ex allatis requisitis sufficiat, ut Sancti, qui eminenti Doctrina, & insigni Sanctitate prævaluerunt, uti Doctores Ecclesiæ habeantur; omni-

bus simul in S. Isidoro ex laudato Canone concurrentibus, haud solum nihil illi deficit, ut tanquam Doctor Ecclesiæ habeatur, sed & multa supersunt. Itaque Sanctus Prudentius Episcopus Trecentis, seu Tricacensis, natione Gallus, [qui sæculo nono scripsit, tribus annis tantummodo transactis, ut ipsemet fatetur, à dicto canone condito] in lib. de *Prædestinatione contra Joannem Scotum cognomento Erigenam cap. 3.*, cujus opus extat tom. 1. Bibliothecæ veterum Patrum in editione Lugdunensi anni 1677. postquam allegasset quasdam auctoritates Sancti Gregorii Magni, & Sancti Isidori in puncto, de quo ibi agit, hæc verba comprobantia hoc idem, quod ex prædicto Canone deduximus profert: *Apostolica Sedis Antistitem Gregorium, & ejus sicut Doctrina, & Fidei, ita Dignitatis, atque officii Socium, beatum videlicet Isidorum Episcopum audias oblatrantem: Verum si Beati Isidori solius contemnendam duxeris auctoritatem, quis te audiat, quis sequatur, nisi mente captus? Cum eum, ejusque doctrinam in causa Fidei Catholicis omnibus congruentem, tanta annositate temporum, & probabilem videat, & susceptam, maxime cum, & hodie Leo Venerabilis Sedis Apostolicæ Antistes missi ante triennium ad Episcopos Britannorum, qui Gallia inferioris partes incolunt, super quibusdam questionibus sue responsionis Epistolâ, censuit, ut quidquid in dubium deveniret, atque in Sacris Canonibus minime inveniri posset, ad Catholicorum Patrum volumina confugiendum, & in eis quicquid esset ambigui requirendum, atque sequendum, quos cum nominatim exprimeret, Beatum Isidorum cum ceteris eodem honore, & dignitate pariter adnotavit: hujus quoniam doctrina, in causa Fidei ab Apostolica Sede approbata cernitur: quicquid contra garrire molitus es, effectatur, nullis in posterum viribus fulciendum.* Nec locum videtur habere, quod Reverendissimus Promotor, ait, ibi: *Textum loqui de Ecclesiæ Doctoribus non stri-*

19

fructo, sed lato modo. Quandoquidem æquè de Sancto Isidoro loquitur Textus, ac de Sancto Augustino, & Hieronymo, æquèque ejus scripta Ecclesiæ commendat, ac utriusque Sancti Doctoris, ut per illa difficultates arduæ, quæ in Ecclesiæ emerferint, quando defunt Canones, decidantur, & resolvantur. Alioquin, nec de Augustino, nec de Hieronymo probari posset ex hoc Canone esse DD. Ecclesiæ. Quando enim dixit Apostolus ad Ephesios cap.4. Ipse dedit quosdam quidem Apostolos, quosdam autem Prophetas, alios verò Evangelistas, alios autem Pastores, & Doctores. Et prima ad Corinthios cap.12. vers.28. Quosdam quidem posuit Deus in Ecclesia primum Apostolos, secundò Prophetas, tertio Doctores: De veris, & propriis Doctoribus locutus est, quos pro omnibus temporibus Deus in Ecclesia sua habuit, habet, & semper habebit. Unde cum Sanctus Leo Hieronymum, Augustinum, & Isidorum Doctores nominat, de eisdem Doctoribus, de quibus Paulus loquitur, venit intelligendus, qui in Ecclesia positi sunt ad eam illustrandam, & illuminandam.

20 Nec premere videtur, quòd dictus Reverendissimus Promotor in comprobationem hujus animadversionis subjungit: Declaratio, quòd SS. Augustinus, Ambrosius, Hieronymus, & Gregorius habendi sint pro Ecclesiæ Doctoribus, facta fuit à Bonifacio Octavo in Cap. Gloriosus de Reliquiis, & venerat. Sanctior. in 6. Cùmque cessante Ecclesiæ declaratione, quis haberi non possit pro Ecclesiæ Doctore, clarissime insertur, Sanctum Isidorum in Canone de libellis distinct.20. fuisse insignitum nomine Doctoris Ecclesiæ non stricto, sed lato modo loquendo. Nam ut jam vidimus num.6., Bonifacius VIII. illos non fecit Doctores, nec ut tales esse tenendos declaravit; sed cùm jam in Ecclesia, ut tales inter alios habiti essent, & recepti, eos ita supponens, uti primarios inter omnes voluit in

tota Ecclesia ritu duplici celebrari, unà cum XII. Apostolis, & quatuor Evangelistis, ut constat ex ipsa decretali Bonifacii, in qua, ultraquam quòd nec ullum verbum de declaratione contineatur, ut optimè observavit Annatus (ubi supra dicto n.6.), expressè hoc in ipsa Decretali habetur; quandoquidem in illa satis disertè exprimit, quòd uti primarios, & egregios inter omnes vult hoc honore ritus duplicis insigniri; Itaque ait: Egregios quoque ipsius Doctores Ecclesiæ &c. specialibus disponsit honoribus venerari; Unde quia Egregii inter omnes Doctores erant, hunc specialem honorem, & cultum illis concessit. Itaque Glossa littera B. ait: Solus Papa habet non solum certos de Sanctis præ aliis extollere, sed etiam eos canonizare.

21 Alioquin verificaretur, quòd usque ad Bonif. VIII. nec Augustinus, nec Hilarius, nec Ambrosius, nec Athanasius, nec Basilus, nec uterque Gregorius, nec ulli alii in Ecclesia Dei habebantur, ut illius Doctores; Cùm tamen in Oecumenica quinta Synodo, ut tales laudentur, ibi: Super hac sequimur per omnia SS. Patres, & Doctores Ecclesiæ Athanasium, Hilarium, Basilium, Gregorium Theologum, & Gregorium Nyssenum, Ambrosium, Augustinum &c., quæ verba sibi objicit, & si ad alium finem, Annatus dicto lib.4. art.1., ubi de Doctoribus agit.

22 Nec pariter locum habere videtur argumentum, quòd prælaudatus Reverendissimus Promotor in horum omnium confirmationem adducit ex Historiâ relatâ à Mariana, cui contestatur Papebrochius in Vita S. Isidori initio §.3. (& est desumpta ex Chron. Episcopi Guensis in Polonia, qui cùm Poenitentiarius Innocentii IV. fuisset, testatur, & firmat id ipsum, quòd Reverendissimus Promotor allegat;) quòd cùm Bonifacius deliberraret de sua Decretali condenda, dubium fuit excitatum, si Sanctus Isi-

dorus esset Sancto Ambrosio præferendus, vel saltem in dicta Decretali etiam comprehendendus; Ex quo hæc infert: *Cumque, nec Sanctus Isidorus fuerit tunc prælatus Sancto Ambrosio, nec fuerit tunc aliis quatuor Ecclesiæ Doctoribus superadditus, bine hinc inferuntur consequentiæ; altera est, quòd de S. Isidoro dici nequit, quòd fuerit consequutus nomen, & gradum Doctoris Ecclesiæ à Leone IV. in citato Canone de Libellis dist. 20. altera est, quòd rigore loquendo, Sanctus ille dici nequit Doctor Ecclesiæ. Nam iudicio meo non probat assumptum, inò potius videtur ex hac historia deduci valere oppositum.*

- 23 Quod mihi videtur suapte natura ex hac historia inferri est, Bonifacium VIII. uti digniores, & inter DD. omnes Egregios, Gregorium, Augustinum, Ambrosium, & Hieronymum, habuisse, & existimasse, vel etiam uti antiquiores, ideoque ad cultum officii duplicis illos, ut tales prælegisse, utendo sua potestate, quæ est, certos de Sanctis præ aliis extollere, ut ait Glossa: Vel etiam infertur, in illa Decretali S. Isidorum illis quatuor non addidisse; tum propter correspondentiam numeri quaterni cum quaterno Evangelistarum; Tum etiam, quia in Ecclesia erant alii insignes Doctores, ut ex Latinis S. Hilarius (de quo Cardinalis Bellarminus in lib. de Scrip-
toribus Ecclesiasticis, ait: *In Ecclesiastica Doctrina ita profecit, ut Doctor Maximus, Ecclesiæ Catholicæ Columna merito habitus sit*), Cyprianus, Irenæus, Prosper, Anselmus, Bernardus, Thomas, Bonaventura, & alii; & ex Græcis S. Athanasius, Basilus, Chrysostomus, uterque Gregorius, Cyrillus, & alii à quinta Oecumenica Synodo supra nominati. Unde si S. Isidorum addidisset, opus erat, ut etiam alios non inferiores ex allatis adderet. Cum ergo Bonifacius solum curaret de designandis quatuor Sanctis Doctoribus, qui uti primarii qua-

tuor Evangelistis corresponderent, ac æquales in Ritu essent, uti Egregios [ut ait] sic illos quatuor præ omnibus elegit. Unde sicut ex prædicta Decretali non infertur, Ecclesiam pro Doctoribus non habuisse hos laudatos Sanctos, neque ut tales apud illam fuisse tunc receptos, ita similiter non infertur, S. Isidorum pro Doctore Ecclesiæ non habuisse, ex hoc quòd in Decretali non nominasset. Et cum aliunde in dicto Canone de Libellis nominatim Isidori mentio fiat, cum de reliquis omnibus allatis DD. solummodo in confuso veniat facta, potius ex hoc sequi videtur, apud S. Leonem, ut præcipuum inter omisso habitum fuisse.

- 24 Et quòd ex laudata Decretali non inferatur, ut Reverendissimus Promotor prætendit, non alios, ut DD. Ecclesiæ esse habendos, nisi Gregorium, Augustinum, Ambrosium, & Hieronymum in ea nominatos, patet. Nam præter omnia supradicta, postmodum ab Ecclesia Sanctis Hilario, & Anselmo Officium Doctoris pro universa Ecclesia fuit concessum; Sicut & Sanctis Joanni Chrysostomo Athanasio, Basilio, & Gregorio Nazianzeno idem officium concessum fuit à S. Pio V., cum antea nonnisi Officio simplici gauderent, ut tradit Gavantus in Commentario ad rubr. 7. Breviarii section. 7. cap. 7. de Festis SS.: quæ omnes concessiones fuerunt factæ, quin præcesserit ulla Ecclesiæ declaratio. Ex quo infertur, quòd in Ecclesia, ut tales Doctores erant habiti, & ut tales recepti, quòd negari haud potest, ex sola Conciliorum generalium lectura, quæ ut Doctores, Patres, & Magistros eos venerabantur (ut supra). Et similiter concessit Ecclesia Officium Apostolorum S. Barnabæ, & si extra numerum Apostolorum, qui in Decretali, & Glossa continentur, sit.

- 25 Ex quibus omnibus duo hæc inferri in favo-

favorem prætensionis videntur. Primum, non obſtare Decreto Bonifacii VIII. conceſſiones Officii Doctōris aliis extra quatuor Doctōres in Decretali nominatis: Quandoquidem ex hoc non minuitur eorum ſupra omnes alios Doctōres excellentia, ut patet ex praxi, & ſenſu Eccleſiæ, quæ ſemper habet uti Primarios Eccleſiæ DD. Gregorium, Auguſtinum, Ambroſium, & Hieronymum, quibus poſtea Angelicus Præceptor S. Thomas, & S. Bonaventura à S. Pio V., & Sixto V. illis adjuñcti fuerunt: ſicut ex eo quod Eccleſia Officium Apoſtolorum conceſſerit S. Barnabæ, & ſi nec inter 12. Apoſtolos numeretur, nec de eo mentio ulla in Bonifacii Decretali fiat, nec in Gloſſa, ubi omnes numerantur, non inferitur minui excellentiam, & ſuperioritatem, quam 12. Apoſtoli ſuper illum habent; Unde quod Iſidoro pro tota Eccleſia concedatur Officium Doctōris, nihil officiit Decretali, nec ſuperioritati reliquorum Doctōrum.

- 26 Itaque in Concilio Provinciali Compoſtellano Salmanticæ celebrato anno 1335., triginta, & quinque annis tantummodo tranſactis à Decretali Bonifacii [quod extat tom. 7. Conciliorum editionis Regiæ Pariſienſis fol. 1964.] cap. 6., juxta morem illorum temporum hoc editum fuit decretum: *Alma Mater Eccleſia, Gloriſſimi Domini Noſtri Jeſu Chriſti in ſuis Sanctis, & in majeſtate admirabili Sacra veſtigia proſequens, & exemplo ducta laudabili Egreſſus Doctōres quatuor duxit venerabiliter honorandos, & eorum feſtivities ſub Officio duplici per univerſas Orbis Eccleſias celebrandas. Nos igitur ejuſdem Matris veſtigiiſ inhxerentes, attendentes, quod Egreſſus Doctōr Beatus Iſidorus de Hiſpania oriundus, & Hiſpalenſis Archiepiſcopus, ipſam Matrem Eccleſiam multipliciter ſuis Sacris Scripturis, & eloquiis decoravit, & quod ejus Sacrum Corpus in partibus Hiſpania, ſcilicet in Civitate Le-*

gionis reconditum obſervatur, per cujus merita totam Hiſpaniam, ſpecialiter terras Domini Regis Caſtellæ, & Legionis, credimus multifarie liberari, ſtatuiſmus, & ordinaviſmus, ut feſtivities ipſius Beati Iſidori Confeſſoris, & Doctōris per univerſas Eccleſias noſtræ Provinciæ annis ſingulis perpetuis futuris temporibus ſimiliter celebretur. Ex quo apparet, Patres illius Concilii in eodem ſenſu fuiſſe; nimirum per illam Decretalem non excludi, alios ut Eccleſiæ Doctōres haberi, nec quòd eodem gaudere poſſint honore, ritu, & officio.

- 27 Secundum quod inferri videtur, eſt, quòd ſi Sancto Hilario, & Anſelmo ex Latinis, & S. Athanaſio, Baſilio, Chryſoſtomo, & Gregorio Nazianzeno ex Græcis conceſſus fuit hic honor, & ſpecialis cultus Officii Doctōrum pro tota Eccleſia, quin pro ſe ullus ex illis habeat ſimilem authenticam declarationem illi, quam Iſidorus, ejuſque opera, in Canone de Libellis habet; potiori titulo concedi poſſet Sancto Iſidoro illam pro ſe habenti, in quo canone S. Leo eum & Doctōrem Eccleſiæ appellat, & ejus doctrinam, ſicut, & Auguſtini, & Hieronymi, tanquam regulam defectu Canonum illi commendat; Quandoquidem hoc videtur Chriſtiſimum ſignum prælectionis inter cæteros, quos expreſſe non nominavit.
- 28 Quo argumentandi genere utitur in prælaudata Decretali Bonifacius. Ait enim, quòd ſicut Deus, eſi cunctos ejus Miniſtros magnificet, altis decoret honoribus, & cæleſtis efficiat Beatitudinis poſſeſſores, illos tamen [ut dignis digna rependat] potioribus attollit inſignis Dignitatum, & præmiorum, uberiori retributione proſequitur, quos digniores agnoſcit, & commendat ingentior excellentia meritorum: Sic & Alma Mater Eccleſia ejus Sacra veſtigia proſequens, & exemplo ducta laudabili, licet univerſos in Regnis Cæleſtibus conſtitutos ſtudiis honorare ſollicitis, & ſonoris efferre præconis non deſi-

ſtat

stat, gloriosissimos tamen &c. Et ex hoc progreditur ad concessionem Officii pro illis quatuor Doctoribus præ cæteris, quia cæteris majores meritò eos existimavit. Unde si Leo, ut dicebamus, à Deo instinctus in sua Decretali Isidorum præ Hilario, Anselmo, & aliis omisis elegit, eum, ejusque opera nominatim Ecclesiæ commendavit, dignum apparet; ut saltem æquali honore, quo præfatos SS. DD. Hilarium, & Anselmum, & reliquos Patres Græcos Ecclesia prosequuta fuit, & illum prosequatur.

S. III.

29 **S**ecundò alio ex capite demonstrari etiam potest S. Isidorum, ut Doctorem Ecclesiæ ab ipsa Ecclesia agnitionem, receptum, approbatum, & declaratum esse, etiam independentem à Canone de Libellis. Etenim cum non aliud exigatur, ut ex Rabaud diximus num. 7., ad hanc declarationem, quam quòd ab eadem Ecclesia, puta ejus capite visibili, aut Concilio generali, ut talis receptus fuerit, & approbatus: demonstrato, ab aliquo ex Romanis Pontificibus præter Leonem IV. esse receptum, & approbatum, ut Ecclesiæ Doctorem, apparebit, quòd independentem ab illo Canone Isidorum, ut Ecclesiæ Doctorem habere possimus, & debeamus. Quòd ergo ita se habeat, patet. Nam Gregorius XIII. in Motu proprio (qui in Summario extat n. 1.), quo approbavit officia Sanctorum Regni Hispaniæ, S. Isidoro hoc concessit officium, ibi: *Item Festivitas S. Isidori Archiepiscopi Hispaniensis, pro quo celebretur Officium Doctoris, & recitetur Credo in celebratione Missæ.* Et infra: *Concessa pro Hispaniarum Provinciis, volumus, ut intelligantur etiam concessa Ecclesiis Insularum, & Terræ firmæ Indiarum dicto Regi Catholico subjectionem.* Ex quo claret Isidorum, ut Ecclesiæ Doctorem esse habendum;

quando quidem ab Ecclesiæ visibili Capite, ut talem videmus receptum, & approbatum. Namque si ut Doctorem Ecclesiæ non haberet, illi officium, quod pro Doctoribus Ecclesiæ in Breviario habetur, non concederet.

30 Nec obstare videtur, si forsan dicatur, ex concessione Officii Doctoris pro Hispania solummodo probari, declaratum fuisse Hispaniarum, sed non totius Ecclesiæ Doctorem; nam responderi poterat, quòd & si de aliquo Sancto, qui nunquam scripsisset, nec suis operibus Ecclesiam illustrasset, sed solummodo aliquod Regnum, sua singulari doctrina, & prædicatione illuminasset, illudve ab erroribus hæresis, vel Idololatriæ purgasset, quin fructus suæ doctrinæ ad totam Ecclesiam se extendisset, posset hoc responsum tolerari; aliter tamen de Sancto Isidoro, qui sua doctrina, & scriptis totam Ecclesiam illuminavit, ut constet ex hucusque dictis, & præsertim ex suismet lectionibus.

31 Sed responsum genuinum judicio meo est; Quòd quemadmodum Sanctis Canonizatis, vel Beatificatis solet concedi Officium pro illis partibus, in quibus in virtutibus resplenderunt, vel ubi nati fuerunt, quin ex hoc inferatur, quòd in tota Ecclesia non possint, uti Sancti, vel Beati haberi, & inter reliquos Sanctos Ecclesiæ numerari, & pro illis Officium in tota Ecclesia recitandum, si Sanctæ Sedi placet, concedi; Sic aliquibus Sanctis Doctoribus Ecclesia solet concedere officium Doctorum pro illis Regionis, vel Provinciis, in quibus plus laborarunt, quasque sua Doctrina, & scriptis specialius illuminarunt, & ab hære sibus purgarunt, quin ex hoc inferri possit, quòd in tota Ecclesia uti illius Doctores, haberi non possint, & inter reliquos Sanctos Doctores numerari, & eorum officium si Sanctæ Sedi placet, toti Ecclesiæ extendi, quan-

quando aliundè constat, quòd etiam pro tota Ecclesia laborarunt, suisque scriptis illam illustrarunt, licèt specialius in proprio Regno emicuerint; præsertim quandò, quod in uno Regno, vel parte Ecclesiæ meruerunt, & laborarunt, etiam in bonum totius Ecclesiæ cedit, licèt, quia ibi specialiter irradiarunt, magisque agniti sunt, majorique devotione coluntur, illum specialem titulum, vel honorem pro tota Ecclesia ibi meritum, ibidem specialius significari, & celebrari, ipsa Ecclesia prætendat, & velit.

32 Et hoc est, quod accidit in Sancto Isidoro, itaut nunquam excogitare fas sit, ex eo illi pro Hispaniis tantum concessum fuisse Officium Doctoris, quia meritis majorem extensionem non erat; quandoquidem tam benemeritis totius Ecclesiæ semper fuit, & est, tantique ejus doctrina, & scripta apud eam habita, quanti apparet ex Testimoniis S. Braulionis, S. Ildephonsi, S. Gregorii, S. Prudentii, Concilii Compostellani, & omnium Scriptorum antiquorum, & modernorum, & ipsiusmet Ecclesiæ in suis lectionibus.

33 Et ultra hæc, & alia quam plurima, hoc ipsum demonstrantia, habemus etiam alia Testimonia, in quibus magis clarescet mentem Gregorii XIII. non fuisse, quòd ut Doctor Hispaniarum tantummodò coleretur. Quomodo enim ex mente Gregorii hoc credi valet, quando & si Canon de Libellis habesset, editum ejusdem Gregorii iussu fuit Decretum Gratiani tot Canones ex operibus Sancti Isidori continens, quos ut regulas una cum reliquis ab omni Ecclesia sequendas exponit? Ex solo enim Concilio Toletano IV. Præsidente Sancto Isidoro, assistentibus in eo 70. circiter Episcopis Hispanis, & Gallis [& in omnibus sententiam Isidori sequentibus] triginta, & sex Canones fuerunt excerpti, ut in Decreto infererentur, ut

ad oram ipsius Concilii legimus citatos [ut videre est in collectione Eminentissimi Cardinalis de Aguirre tom. 2. pagin. 477.], & ex Concilio Hispalensi 2. cui similiter Sanctus Isidorus præfuit, habemus alios multos ad marginem pariter notatos [in eodem tom. pag. 462.]. Habemus etiam, quòd Gregorius IX. in suis Decretalibus sæpè sententiis Isidori utitur. Et Innocentius III. in cap. ad hæc de Officio Archidiaconi ex sententia S. Isidori causam definivit, ibi: *Archidiaconus secundum statuta Beati Isidori &c.* Ubi observandum est, statuta vocare Isidori Testimonia. Et etiam multa ex capitibus Decretalium sunt ad literam ex S. Isidoro desumpta, ut videri potest in Cap. *Puberes de desponsat. impuberum*, & in Cap. *Quamvis*, & in Cap. *Forus*, & in Cap. *Pactum*, & in Cap. *Ius dictum, de verborum significatione*, quæ omnia desumpta sunt ad literam ex Sancto Isidoro, ut ex ipsorum Epigraphis patet.

34 Deinde habemus, quòd in Concilio Toletano VIII. celebrato 17. annis post Isidori dormitionem, ubi 52. Episcopi, & 12. Abbates assiderunt, quos inter S. Ildephonsus, cum in eo Patres Cap. 2. in comprobationem ejusdem Decreti attulissent varia Sacre Scripturæ Testimonia, & auctoritates Ambrosii, Augustini, & Magni Gregorii; afferendo testimonium Isidori, in hoc præconium illum ad Cælum elevantes proruperunt: *Nostri quoque sæculi Doctor Egregius, Ecclesiæ Catholicae novissimum Decus, præcedentibus ætate postremus, doctrinæ comparatione non infimus, & quod majus est, in sæculorum sine doctissimus, atque cum reverentia nominandus Isidorus, in libro Sententiarum secundo, hæc pro tali narrat negotio.* Et recitato Testimonio, postea prosequuntur. *Similiter in synonymis: In multis promissis rescinde fidem, in turpi voto muta decretum; quod incautè voti non facies, impia est promissi, quæ scelere adim-*

adimpletur. Et concludunt : Hæc de sacris paginis, authoribusque præcipuis brevissime sufficiat prælibasse. Ubi post tot præconia, inter præcipuos Ecclesiæ Patres, & Ecclesiæ Doctores, Isidorum (& quidem recenti adhuc obitu ejus) collocant, & tot magnificis titulis honorant.

35 Habemus etiam Concilium Toletanum XV. ubi Præsides S. Juliano Archiepiscopo Toletano titulo Egregii Doctoris Isidorus laudatur, ibi: *Sequentes sententiam Doctoris Egregii Hispanensis Sedis Episcopi*, quo eodem titulo antea Augustinum laudaverat : ibi: *Sequentes Doctoris egregii Augustini sententiam*.

36 Habemus S. Braulionem ejus Discipulum in supra laudata Abbreviatione apud Papebrochium Cap. II., qui non solum Doctorem eximium eum appellat : ibi: *Sic namque de virtute in virtutem proficiens resulsit Doctor eximius &c.* Sed etiam Magno Gregorio hac singulari ponderatione æquiparat, ibi: *Sicut Gregorius Doctor Romæ successit Petro, ita Beatus Isidorus in Hispaniarum partibus doctrina Jacobo successit Apostolo*.

37 Habemus S. Ildephonsum, qui post Isidori mortem ad ejus sepulchrum, ubi inter Sanctos Leandrum, & Florentinam jacebat, in Cruce argentea eorum gesta depingi fecit, & carminibus jam afferendis devotissime proclamari, ut tradit ex laudatis manuscriptis Toletanis Papebrochius cap. 10. ejus vitæ, ibi: *Beatus Ildephonsus, Archipræsul Toletanus, inclucta Sanctitatis, qui de pectore Magistri Doctrinæ latitantes hauserat purissimos, ad Magistri decorem in parte Ecclesiæ, qua Sancti Doctores [Isidorus, & Leander] quiescebant, eorum gesta miro fecit opere depingi, & in Cruce argentea, quæ Sanctorum superjacebat monumentis hoc carmen significavit*. In quibus carminibus eum Doctorem Ecclesiæ appellat, ut in sequentibus decerptis patebit.

Orthodoxus Arium, Dirum Adversarium

Rationis calculo

Confundit hic Malleus; cessit hostis sellens

Victus in propatulo.

Iberi devotio Cleri, pleno gaudio

Colat Patrem Patriæ;

Contemplando Dogmata Cosmi laudent Climata

Doctorem Ecclesiæ.

38 Habemus Lucam Tudensem, qui adversus *Albigenses* lib. 2. cap. 4. hæc de S. Isidoro ait: *Quamvis hæc duo magnæ Cæli luminaria (Gregorius, & Isidorus) essent spatiis Terrarum sejuncti, tamen in unitate Sancti Spiritus adunati, eadem uterque sententia redolebat, ut in ore Sanctissimorum duorum Testium veritatis testimonia firmarentur. Fateamur ergo eorum scripturas per Sanctum Spiritum concordare, ut dictum est, & non ex suffragiis mendicatis tam insignes Ecclesiæ Dei Philosophos concordare.*

39 Habemus laudata manuscripta Toletana, quæ aliud singulare testimonium cap. 10. nobis offerunt, fortè desumptum ex Redempto Diacono S. Isidori discipulo, ut colligitur ex eo quod Papebrochius §. 2. Vitæ Sancti Doctoris tradit. In dicto enim Capite hoc legimus: *Sed perfectissimi viri quid miracula notem, quid virtutes magnificem, quid scientiam prædicem, quid Doctrinam commendem, quid mores extolam? nam in Apostolico viro, imò post Apostolos Christi Apostolo, virtutum consonantiam quid quæras? cum in eo prudentiam Noë, fortitudinem Abrææ, temperantiam Isaac, justitiam Jacob, patientiam Job evidenti ratione conspicias. Quid doctrinæ præferas gratiam? in quo Doctoris gentium veritatem exuberare, disciplinam Spiritu fervere, zelum, scientiam abundare reperies. Quæ major laus de Isidoro, quàm hæc cum Doctore Gentium comparatio, dici valet?*

40 Habemus, quod apud Nationem Gallicam

licam tanti habentur Opera S. Isidori, quod ultra testimonium allegatum. S. Prudentii, in quo Isidorum Sancto Gregorio Magno æquat, & de ejus scriptis ait, quod num. 17. exprimitur; in Concilio Aquisgranensi celebrato anno 816. sub Ludovico Pio, tot testimonia S. Isidori inserta fuerunt, quod magna ex parte ex eis constari videatur, ut ex ipsomet apparet; & in aliis pluribus celebratis tempore Caroli Magni, & ejusdem Ludovici invenitur etiam pluries laudatus: Nec his temporibus ea summa Gallorum laus illi deest, ut apparer in supra laudato Petro Annato, qui eodem lib. 4. art. 2. inquirens. *Qui sint Ecclesie Patres dicendi?* afferens artic. 39. Sanctum Isidorum, ita de eo loquitur: *Sanctus Isidorus Hispaniensis Ecclesie Sydnus, Doctor, & Decus &c.*

41 Tandem (alia quamplurima omittendo testimonia, quæ ex Scriptoribus Hispanis antiquis, & modernis possent afferri) habemus Testimonium illud, quod ponderationes omnium excedit, nimirum Magni Gregorii, qui de Isidoro, quando ad ejus manus liber de Beatitudine à Sancto Doctore ipsi dicatus pervenit, hæc verba protulisse fertur: *Ecce alter Daniel. ecce plusquam Salomon hic, ut supra num. 14. Et quod tanti ejus Doctrinam, & Sanctitatem haberet, quod ad hanc Almam Urbem eum vocaverit, ut Concilio Romæ celebrando assideret, ut ex ejus lectionibus pro Hispania concessis supra vidimus num. 14., ubi & legimus quanti habita fuerit in illo Concilio ejus sententia, ibi: Mirum est, quantum ponderis, & auctoritatis habuerit in singulis rebus Isidori sententia apud Pontificem, & ejus Prelatos: Ut in 3. lectione.*

42 Quam historiam præcitata manuscripta à Papebrochio laudata cap. 5. ita accidisse enarrant: *Denique quæ Civitas, quæ solitudo, quæ Marks, quæ hujus Doctoris non senserit beneficia? Peragrans itaque*

Dei servus Fidelium mentes Verbi Dei paulo reficiendo, pauperes Christi in elemosynis recreando, hæreticorum Dogmata sollicitè persequendo, in universis Hispaniarum Provinciis ad inclytam pervenit Romanam Urbem, Summo Pontifice [Gregorio nimirum] id humiliter postulante, qui quanto honore, & reverentia à Romano Antistite, & Cardinalibus fuerit receptus, non est nostræ differere valetudinis, sed ex officiis, & dilectionis obtemperantiis erga eum exhibitis, per facile lector conjicere potest. Onere namque totius Curie sibi imposito omnes se, ei quasi Patri pio, salva Apostolica excellentia, offerebant benignè, ut etiam si liberet, gerere nobilissimi famulorum vires, supplerent, & humilitate, qua poterant, ministrarent; dignum ducentes prudentissimi viri, ut quia pro fide Catholica, & Ecclesie Romanæ honore ipsum despectis tormentis Principum, morti exposuerat, & multis Scripturarum sententiis Matrem Ecclesiarum omnium comprobaverat, ab eisdem Romanis condigno veneraretur honore. Placuit etiam cunctis, ut Ecclesie Prelati ad Sanctam Synodum convenirent, ut si quid inhonestum reperiretur, aut ambiguum, cum eodem Sanctissimo corrigeretur Isidoro; quem summo desiderio in Romana Curia ad sui decorem detinuisent, nisi in Ecclesie detrimento ipso insinuante, hoc cessurum agnoscerent. Dimissa itaque Synodo, quidquid voluit in Romana Curia ordinavit, & omnibus affectus merore dimissis, cum maximo honore, & Apostolicis muneribus, in Hispaniam regressus est.

43 Et in Prologo hujus vitæ, hæc etiam relative ad hunc casum continentur: *Gregorium revera in Beatissimi Apostolorum Principis loci simul, & meriti, principatu universi Orbis præfecit auctoritas; Isidorum autem Romanæ censura Curie alterum profiteri Gregorium, meritorum effecit paritas. Et quidem singula, quæ non tantum cursu naturæ, verum etiam ea, quæ Divina providentia miraculosa senescenti mundo, per eum mirabiliter ad illuminationem Ecclesie dignata est operari &c. Qui*
hi-

historiæ, etsi non desint, qui de illa dubitent Papebrochius consentit in notis ad hoc caput 5. *litera D.*, & etiam eam confirmat Antonius Cafalis Cælestinus, Author Bononicensis in *descriptione Basilicæ illius Civitatis, qui pagina 370.*, postquam multa dixerat de Isidoro, ait, quòd cum S. Doctor rediret è Roma, Bononiam petens, ibi gravi infirmitate detentus, obiit in Domino. In quò licet omninò erret, cum S. Doctor Hispali indubitanter obiisset, tamen historiam adventus confirmat. Et pariter, licet sub eadem fallentia, eam confirmant Carolus Signatus, Leander Albertus, Donatus Pullienus, Cherubinus Chirardacius, Celsus Faloneus, Antonius Masinus, & alii Itali, quos omnes quoad hanc circumstantiam mortis refutat laudatus Papebrochius initio hujus vitæ §.2.

S. I V.

44 **E**X quibus omnibus apparet, concessionem Officii Doctoris cum Credo pro S. Isidoro à Romano Pontifice Gregorio XIII. factam pro tota Hispania, & pro Insulis Regi Catholico subiectis, & pro tota America [ut supra n.30.], non eo fuisse, quia uti Hispaniarum Doctorem eum tantummodò habebat, sed quia inter Ecclesiæ Doctores collocatum ex omnibus allatis eum reputabat, ut Ecclesia semper eum, ut constat ex hucusque dictis, reputavit: Quin iudicio meo dubitari valeat, quòd sicut pro Hispania (ubi de S. Isidoro recitabatur) hoc Officium concessit, & approbavit, etiam pro tota Ecclesia, si de eo in ea recitaretur, idem Officium concessisset, & approbasset; quandoquidem Motu proprio ad nullius supplicationem illud concessit, ut ex eius *litera* apparet. Unde si Serenissimus Rex Catholicus petiisset à Sancta Sede, ut Officium ad totam Ecclesiam extenderetur, proculdubio fuisset ab

ipsomet Gregorio concessum. Cum ergo supplicatio Regis Catholici ad hoc non se extendisset; imò nec ad Officium Doctoris pro Hispania, nec pro suis Dominis, sed tantummodò fuisset facta ratione difficultatum, quæ occasione Missalis, & Breviarii editi à S. Pio V. ortæ in illo Regno fuerunt (ut patet ex ipso Motu proprio, ubi relatio de supplicatione fit); nihil mirum, quòd concessio, & approbatio solummodò Hispanias respexisset.

45 Unde, cum hodie Serenissimus Rex Catholicus coadiuvando prætensionem Reverendissimi D. Archiepiscopi Hispalensis, & ejus Venerabilis Capituli, & Senatus illius Civitatis, ac Ecclesiarum omnium Cathedralium Hispania; & aliorum Senatum ejusdem Regni, à Sanctissimo D. Nostro enixè efflagitet pro hac gratia, extensionis Officii S. Isidori pro Hispania concessi, ad totam Ecclesiam sub ritu duplici, exemplo tot similium gratiarum præteritis annis pro aliis Sanctis concessarum: Et cum non aliud Caput huic extensioni objiciatur à R. Promotore Fidei, nisi, quòd pro Doctore Ecclesiæ non est habitus; satisfacta hac animadversione, ut plenissimè satisfactam manere credo: Iudicio meo, independentè ab speciali obligatione, quæ tot iustis titulis me inclinare poterat, ob supra initio dicta, non apparet ratio, ut hæc extensio denegari ullo modo valeat.

46 Itaque quoad eam sensus meus est, S. Isidorum Archiepiscopum Hispalensem mereri, quòd S. Congregatio supplicationi annuat, & Officium Doctoris illi pro Hispania concessum sub ritu duplici, sub eodem ad totam Ecclesiam extendendum venire delectet. Quandoquidem Ecclesiasticus ad hoc nos excitat Cap.44. vers.1. dicens: *Laudemus viros Gloriosos &c.* Et infra vers.15. *Sapientiam ipsorum narrent populi, & laudem eorum nuntiet Ecclesia.*

- 47 Quoad secundam verò prætensionis partem, nimirum quod in Hispania celebretur sub ritu secundæ Classis, cum Octava, aliter ex parte sentio. Nam cum duas gratias hæc petitio contineat, quarum altera est, quod in Hispaniæ Regnis celebretur officium S. Isidori sub ritu secundæ Classis; altera vero, quod celebretur cum Octava. Quod attinet ad hanc secundam denegari mihi posse videtur, tum ob rationes à Reverendissimo Promotore allatas; tum etiam, quia rarò posset Octava componi cum festis eo tempore occurrentibus. Quod attinet ad primam, nullam difficultatem invenio, ut concedi possit, & valeat. Itaque sentio, hanc Sacram Congregationem, annuere posse, ut Officium S. Isidori in Hispaniarum Regnis, Dominis adjacentibus, & America sub ritu secundæ Classis celebrari queat.
- 48 Quas duas concessiones, pro D. Isidoro dignas S. Braulio satis clarè proclamat loco citato, dicens: Interea fratres charissimi, dignum est, ut hunc Sanctissimum Confessorem Isidorum, omnis laudibus attollat Ecclesia, sed maxime Hispaniarum, quæ præ cæteris specialius ejus saluberrimam refulsit Doctrinam. Ubi majorem cultum, pro Hispania exigit.
- 49 Et ad utramque concessionem multum juvare debet, & inclinare animum hujus S. Congreg., quod S. Isidorus non solum Ecclesiam suis scriptis illustravit, nec solum in hæresi Ariana pœnitens ab Hispania eliminanda ab adolescentia laboravit (ut in suis lectionibus habemus) nec solum in Doctrina Mysterii Beatissimæ Trinitatis in illis Regnis firmanda, & in Acephalorum hæresi suo tempore orta extinguenda, ut habemus in Concil. IV. Toletano, & in II. Hispalensi, nec solum in disciplina Christiana Ecclesiastica, & Regulari in illis Regnis instauranda insudavit; sed etiam totam Hispaniam, cunctamque Ecclesiam edocuit de infallibili Romanorum

Pontificum autoritate, deque obedientia eis, corumque decretis debita, uti apparet in Epistola Eugenio Archiep. Toletano directæ, quæ in ejus operibus impressionis Colonie Agripinæ ann. 1617. extat fol. 488. ubi illi sic ait: Quod verò de paritate agitur Apostolorum, Petrus præminet cæteris, qui à Domino audire meruit, tu vocaberis Cephas, tu es Petrus &c. Et non ab alio aliquo, sed ab ipso Dei, & Virginis filio honorem Pontificatus in Christi Ecclesia primus suscepit: Cui etiam post resurrectionem Filii Dei ab eodem dictum est, Pasce Agnos meos; Agnorum nomine Ecclesiarum Prælatos notans, ejus Dignitas potestatis, & si ad omnes Catholicos Episcopos est transfusa; specialius tamen Romano Antistiti singulari quodam privilegio, velut capiti cæteris membris celsior permanet in æternum. Qui igitur debitam ei non exhibet reverenter obedientiam, à capite se junctus, Acephalorum Schismati se reddit obnoxium; sicut illud S. Athanasii de Fide Sanctæ Trinitatis Sanctæ Ecclesiæ approbat, & custodit quasi Fidei Catholice articulum, quod nisi quisque fideliter firmiterque crediderit, salvus esse non poterit.

50 Et similiter in Epistola ad Claudium Ducem missa, quæ ibidem fol. 487. extat, ubi sic illi ad quædam quæsitæ respondet: Te quidem me piis urgente petitionibus, tuis inquisitionibus respondere lator in Domino; quia ea, quæ sunt de Fide Catholica, sollicitè perquiris. Ad id ergo, quod objicisti, primò prætermisisti plurimis rationibus, tibi rationabiliter, ac simpliciter respondemus: Sic nos scimus præesse Ecclesiæ Christi, quatenus Romano Pontifici reverenter, humiliter, & devotè, tanquam Dei Vicario, præ cæteris Ecclesiæ Prælati, specialius nos fateamur debitam in omnibus obedientiam exhibere. Contra quod quæquam procaciter venientem tanquam hæreticum à consortio Fidelium omnino decernimus alienum. Hoc verò non ex electione proprii arbitrii, sed potius auctoritate Spiritus Sancti habemus firmum, ratumque credimus, & tenemus.

- 51 Et in alia Epistola ad Redemptum Diaconum ejus discipulum, quæ extat fol. 488. in fine, ait: *Diligenter per omnia inspicere, & reperies Sanctæ Romanæ Ecclesiæ consuetudines à divinis auctoritatibus in nullo aliquatenus deviare. Pro me ad Dominum orare quæso digneris. De quibus omnibus satis testatur S. Braulio, qui in laudata abbreviatione ejus vitæ ait: Quo vero flumine eloquentiæ, & quibus jaculis divinarum Scripturarum, seu Patrum testimoniis omnium nefarias hereses destruxerit, & evanuerit, Synodalia gesta coram eo Hispalis, & Toleti acta declarant, in quibus, & Romano Pontifici à Fidelibus loco Beati Petri Apostoli substituto, debere obediri, & uni Deo in Trinitate Personarum serviri, clarissimis Scripturarum testimoniis approbavit. Quæ omnia etiam in prælaudatis manuscriptis inveniuntur cōtestata, & in Concilio Toletano quarto satis manifesta. Cùm ergo in cap. 6. hujus celeberrimi Concilii dubium excitaretur de Baptismo, si per unam, vel trinam immersionem fieri deberet, in hæc Isidorus prorupit: Quid à nobis in hac Sacramenti diversitate finiendum sit, Apostolicæ Sedis informemur præceptis; non nostram, sed paternam institutionem sequentes. Beatæ igitur memoriæ Gregorius Romanæ Ecclesiæ Pontifex, qui non solum partes Italiæ illustravit, sed & longè existentes Ecclesias sua doctrina perdocuit, efflagitante Sanctissimo Leandro Episcopo, de hac Hispaniæ diversitate. Quid potius esset exequendum, inter cetera rescribens ei, sic ait &c. Et similiter cap. 17. definitum fuit librum Apocalypsis, ut Canonicum esse recipiendum, quia à Sanctæ Sede declaratum fuerat, Joannem Evangelistam ejus Auctorem fuisse.*

§. V.

- 52 Quod attinet ad prætensionem extensionis Officii S. Leandri pro tota Hispania sub ritu duplici, sunt tam efficaces rationes, quæ allegantur pro parte Venerabilis Capituli, ut vix

occurrat addendum, quod urgere plus valeat. Sed adhuc non omitam hic congerere ea omnia testimonia Sanctissimi Pontificis Gregorii Magni, ex quibus ostendi melius valeat, quanti Leander, adhuc in humanis agens, apud Ecclesiam habitus fuerit, quantique ejus Sanctitas, & doctrina. Meruit enim, ut hic Sanctus Pontifex ejus visibile Caput tantum conceptum de ejus Sanctitate, & doctrina fecerit ex quo eum, dum Cardinalis esset, Constantinopoli agnovit, quod ad apicem Pontificatus assumptus quando jam Leander ad suam Ecclesiam reversus erat, ita ad illum rescriberet [ut libro 7. Epistolarum Epistola 126. legimus]: *Sanctitatis Tux suscepi Epistolam solius charitatis calamo scriptam, ex corde enim lingua tinxerat, quod in carthæ pagina resundeat: Boni autem, sapientesque Viri, cùm legeretur, assuerunt, quorum statim viscera in compunctione commota sunt: Cæpit quisque amoris manum in suo corde te rapere, quia in illa Epistola tuæ mentis dulcedinem non erat audire, sed cernere. Accendebantur, & mirabantur singuli, atque ipse ignis audientium demonstrabat, qui fuit ardor dicentis: nisi enim prius in se facies ardeant, alium non succendunt; Ibi ergo vidimus, quanta charitate tua mens arserit, quæ sic, & alios accendit. Et deinde subiungit: Vitam verò vestram, cujus ego semper magna veneratione reminiscor, minime noverunt, sed eis altitudo vestri cordis patuit ex humanitate sermonis. Et epistola 41. ex illis, quæ sub libro 1. continentur illi ait: Quamvis etiam absentem corpore, præsentem mihi te semper intueor, quia vultus tui imaginem intrâ cordis viscera impressam porto. Et libro etiam 3. Dialogorum sic de illo cap. 31 loquitur: Viro Reverendissimo Leandro Hispalitano Episcopo, dudum mihi in amicitii familiariter juncto.*

- 53 Nec his solum sui amoris signis, quibus demonstrabat conceptum in quo illum tenebat, continere se posuit: Libros etenim, quos in Job scripsit, quos-

quosque tanti Ecclesia habet, illi [ut ex eorum præfatione constat] dedicavit, & per sequentes literas (quæ extant lib.4. Epistola 46.), una cum Pastoralis, adhuc, & cum corde, ad manus ejus transmissit. Quanto ardore (illi ait) videre te sitiam, quia valde me diligis, in tui tabulis cordis leges. Sed quia longoterrarum spatio disjunctum te videre nequeo, unum quod mihi de te dictavit charitas feci, ut librum Regulæ Pastoralis, quem in Episcopatus mei exordio scripsi, & libros quos in expositionem Beati Job jam dudum me fecisse cognovisti, Sanctitati Vestræ transmittere curavi.

54 Et tandem aliis benevolentia officii prætermisiss, illud non omitam, quod Thomasinus tom.1. veteris, & novæ disciplinæ lib.2.cap. 54.n.6. refert: Illud præterea (ait) collige, quod Leandro Hispalensi Episcopo cum Legatione, & Vicariatu Apostolica Sedis collatum à Gregorio pallium sit. (Quod tunc temporis singulare privilegium erat). Ex quo forsitan Baronius motus fuit, quando ad annum 589.ait se credere S.Leandrum in Concilio Toletano III. tanquam Sedis Apostolicæ Legatum interfuisse. Et in eo legitur illa oratio gratulatoria quam magnis laudibus idem Baronius ad dictum annum num.20. extollit. Et prætermitto omnia, quæ gessit, ut hoc congregaretur Concilium, cui 72. Episcopi affiderunt, adhuc, & Recaredus Rex, cum toto Clero, & Proceribus totius Regni, ubi abjurata hæresis Ariana fuit, & Fides Catholica uno ore laudata, & uno corde recepta, in qua Leander Regem, & Regnum totum instruxerat.

55 Sed non omitam, quæ Isidorus frater ejus lib. de Scriptoribus Ecclesiasticis cap.28. de illo scribit: Leander, genitus Patre Severiano Carthaginensis Provinciæ Hispaniæ, professione Monachus, & ex Monacho Hispalensis Ecclesiæ Provinciæ Bætica constitutus Episcopus: vir adeo suavis eloquio, ingenio præstantissimus; vita quoque utque doctrina clarissimus, ut etiam fide

ejus atque industria populi Gentis Gothorum ab Ariana insania ad Fidem Catholicam reverterentur. Hic namque in exilii sui peregrinatione composuit duos adversus hæreticorum dogmata libros, eruditione Sanctarum Scripturarum ditissimos, in quibus vehementi stylo Ariana impietatis confodit, ac detegit pravitatem, ostendens scilicet, quid contra eosdem habeat Ecclesia Catholica, & quantum distet ab ejus Religione, & Fidei Sacramentis. Extat, & aliud laudabile ejus opusculum adversus instituta Arianorum, in quo propositis eorum diffis suas responsiones opponit. Præterea edidit unum ad Florentinam Sororem de institutione Virginum, & contemptu Mundi libellum, titulorum distinctionibus prænotatum. Siquidem, & in Ecclesiasticis officiis idem non parvo elaboravit studio. In toto enim Psalterio duplici editione orationes conscripsit. In Sacrificiis quoque, laudibus, & Psalmis multa dulcisona composuit. Scripsit, & Epistolas multas ad Papam Gregorium, de Baptismo unam, alteram in qua præmonet, cuiquam mortem non esse timendam. Ad ceteros quoque Episcopos plurimas promulgavit familiares Epistolas, & si non lapsi [forte limpidi] splendidas verbis, acutas tamen sententiis. Floruit sub Recaredo viro Religioso, ac Principe glorioso, cujus etiam temporibus mirabili obitu actualis vita terminum clausit.

56 Cui adjungere lubet, quod idem Sanctus Doctor ad Claudium Ducem, quem de multis ad Fidem pertinentibus instruebat, scripsit: Memento communis nostri Doctoris Leandri, & ejus Fidem atque doctrinam pro viribus imitare: ut in presenti bonis perfrui, & in futuro celestium bonorum participationem valeas adipisci.

57 Quibus tandem adjungere debemus, quod Martyrologium Romanum 3. Kal. Martii de Leandro tradit: Hispali in Hispania Natalis S. Leandri ejusdem Civitatis Episcopi; cujus predicatione, & industria Visigothorum Gens, adjuvante Recaredo eorum Rege, ab Ariana impietate ad Catholicam Fidem conversa est. Et quod

quod laudatus Magnus Gregorius lib. 3. Dialogorum cap. 31. refert, *Leandrum* prædicatione sua *Hermenegildum* suum nepotem [erat enim filius Sororis suæ *Theodoræ* *Leovigildo* Regi desponsata] ad Fidem Catholicam convertisse. Ait enim: *Sicut multorum, qui ab Hispaniarum partibus veniunt, relatione cognovimus, nuper Ermigildus Rex, Livigildi Regis Visigothorum filius, ab Ariana heresi ad Fidem Catholicam, viro reverentissimo Leandro Hispalitano Episcopo, dudum mihi in amicitia familiariter juncto, prædicante, conversus est.* Ex quibus omnibus satis demonstratur, quanta fuerit magnitudo Sanctitatis, & Doctrinæ *Leandri*, quamque abundè erga Sanctam Ecclesiam mereatur, ut vel ex hoc solo ponderato titulo, quod miseratione divina tota Hispania per illum præcipuè ab hæresi *Arriana*, quæ illam opprimebat, videretur libera, illi extensio cultus saltem pro eodem Regno concedatur, atque ita ejus Officium in omnibus Hispanis Dominiis celebretur: quandoquidem hoc tam grande beneficium non minus cogit, urget, & premit Regnum Hispanum, omnesque ejus Ecclesias ad hanc prætensionem toto conatu promovendam, sed & universalem Ecclesiam ad illius impellit indulgentiam concessionem, ut ita ab omnibus saltem populis Hispaniæ ille hoc speciali cultu honoretur, per quem omnes meruerunt, quod Gentes Gothorum illos dominantes à peste *Ariana*, quæ totum Regnum infestabat, liberi evassent.

- 58 Cum ergo hodie ex his omnibus Serenissimus Rex Catholicus, coadjuvando etiam prætensionem Reverendissimi

Domini Archiepiscopi Hispalensis, & ejus Venerabilis Capituli [hanc causam efficacissimè promoventis] & Senatus ipsius Civitatis, ac ferè omnium Hispaniæ Ecclesiarum non minus enixè pro hac gratia efflagitet, ac pro præcedenti; Et cum aliunde non aliud à Reverendissimo Promotore Fidei pro denegatione illius objiciatur, quàm, quod nullum novum miraculum ostenditur intercessione *Beati Leandri* à Deo patratum, quo intelligi valeat hanc novi cultus velle extensionem; quod pro similibus concessionibus necessarium minimè existimatur; quandoquidem aliæ multæ similes concessæ absque hac circumstantia inveniuntur: Ex his inquam omnibus, & ob eam summam venerationem, & laudem, quam adhuc in humanis agens, meruit ab hac Sancta Sede, in Magno Sancto Gregorio, Ecclesiæ clavum tenente, mihi eam concedendam venire pariter existimo, & sentio.

- 59 Itaque sensus meus est, quod Officium à Sancta Sede pro S. *Leandro* approbatum, & Ecclesiæ Hispalensi concessum, sub ritu duplici ad totam Hispaniam, omniaque Regis Catholici Dominia extendatur. Præfens habens, quod idem Ecclesiasticus, postquam dixerat Cap. 44. *Laudemus viros gloriosos, & Parentes nostros in generatione sua* V. 7. addit: *Omnes isti in generationibus gentis suæ gloriam adepti sunt, & in diebus suis habentur in laudibus. Qui de illis nati sunt reliquerunt nomen narrandi laudes eorum.* Omnia tamen Superiori hujus Sacræ Congregationis judicio submitto.

Datum Romæ die 8. Decembris 1721.

Ludovicus Cardinalis Belluga.